

দেবী

সে আজ কিঞ্চিদধিক একশত বৎসরের কথা।

পৌষমাসের দীর্ঘ রজনী আর কিছুতেই পোহাইতে চাহে না। উমাপ্রসাদের নিদ্রাভঙ্গ হইল। লেপের ভিতর অনুসন্ধান করিল, স্ত্রী নাই। বিছানা হাতড়াইয়া দেখিল তাহার শোড়শী পত্নী এক পাশে গুটিসুটি হইয়া পড়িয়া ঘুমাইতেছে। সরিয়া গিয়া—অতি সত্ত্বপর্ণে তাহার গায়ে লেপখানি চাপাইয়া দিল। পাশে পায়ের দিকে হাত দিয়া দেখিল কোথাও ফাঁকা রহিতেছে কি না।

উমাপ্রসাদ বিংশতিবর্ষীয় যুবক। সম্প্রতি সংস্কৃত ছাড়িয়া সখ করিয়া পারস্যভাষা শিক্ষা করিতে আরম্ভ করিয়াছে। মান নাই;—পিতা পরম পণ্ডিত, পরম ধার্মিক, নিষ্ঠাবান শক্তি উপাসক, গ্রামের জমিদার, সম্মানের সীমা নাই। অনেকের বিশ্বাস, উমাপ্রসাদের পিতা কালীকিঙ্কর রায় মহাশয় একজন প্রকৃতসিদ্ধ পুরুষ, আদ্যশক্তির বিশেষ অনুগৃহীত। গ্রামের আবালবৃদ্ধ তাঁহাকে দেবতার মত শ্রদ্ধা করে।

উমাপ্রসাদ আপনার নবীন জীবনে সম্প্রতি নবপ্রণয়ের মাদকতা অনুভব করিতে আরম্ভ করিয়াছে। পাঁচ ছয় বৎসর পূর্বে তাহার বিবাহ হইয়াছে বটে কিন্তু পত্নীর সহিত ঘনিষ্ঠতার সূত্রপাত এই নূতন। স্ত্রীর নাম দয়াময়ী।

স্ত্রী গাত্র আবৃত করিয়া উমাপ্রসাদ তাহার গণ্ডস্থলে একখানি হাত রাখিল—দেখিল সে স্থান শীতে শীতল হইয়া গিয়াছে। অত্যন্ত ধীরে ধীরে পত্নীর মুখচুম্বন করিল।

যেরূপনিয়মিত তালে দয়াময়ীর নিঃশ্বাস বহিতেছিল, সহসা তাহার ব্যতিক্রম হইল। উমা জানিল স্ত্রী জাগিয়াছে। মৃদুস্বরে ডাকিল—“দয়া।”

দয়া বলিল—“কি?” “কি’টা খুব দীর্ঘ করিয়া বলিল।”

“তুমি বুঝি জেগে রয়েছ?”

দয়া ঢোক গিলিয়া বলিল—“না ঘুমুচ্ছিলাম।”

উমাপ্রসাদ আদর করিয়া স্ত্রীকে বুকের কাছে টানিয়া আনিল। বলিল—“ঘুমুচ্ছিলে ত উত্তর দিলে কে?”

দয়া তখন আপনার ভুল বুঝিতে পারিয়া অপ্রতিভ হইল। বলিল—“আগে ঘুমুচ্ছিলাম, এখন জেগে উঠলাম!”

উমাপ্রসাদ জিজ্ঞাসা করিল—“এখন কখন? ঠিক কোন্ সময়?”—উমা ভারি দুষ্ট।

“কোন্ সময় আবার? সেই তখন!”

“কখন?”

“যাও আমি জানিনে।” বলিয়া দয়া স্বামীর বাহুপাশ হইতে মুক্ত হইবার বৃথা চেষ্টা করিল। ঠিক কখন জাগিয়াছে, দয়াও কিছুতে বলিবে না, তাহার স্বামীও কিছুতে ছাড়িবে না।

দয়া বলিল—“দেখ, আজ আমার মনটা কেমন হয়ে গেছে। খোকা এখনও এল না। কি জানি, কেন মনটা এমন হয়ে গেল!”

উমাপ্রসাদ বলিল—“এখনও খোকার আসবার সময় হয় নি। যে দিন ঘুমিয়ে পড়ে সে দিন ত আসতে দেরিও হয়! তোমার মন যে জন্যে খারাপ হয় নি। কেন হয়েছে আমি জানি।”

“কেন বল দেখি?”

“বলেছি কি না আমি পশ্চিমে যাব চাকরি করতে, তাই তোমার মন খারাপ হয়ে গেছে।—“বলিয়া উমাপ্রসাদ স্ত্রীকে নিজের আরও কাছে টানিয়া লইল।

দয়া একটি ছোট দীর্ঘনিশ্বাস ফেলিয়া বলিল—“আমি বুঝতে পারছিলাম। মনে হচ্ছে যেন আর তোমার সঙ্গে দেখা হবে না।”

বাহিরে জ্যোৎস্না নিরতিশয় স্নান। পত্নীর কথা শুনিয়া উমাপ্রসাদের মুখখানিও স্নান হইয়া গেল।

অনেকক্ষণ দুইজনে দাঁড়াইয়া রহিল। চাঁদ ডুবিয়া গেল। গাছপালা অন্ধকারে গা ঢাকা দিল। জানালা বন্ধ করিয়া উভয়ে শয্যা ফিরিয়া আসিল।

ক্রমে একটা আধটা পাখির ডাক শোনা গেল। পরস্পরের বক্ষে নিবদ্ধ হইয়া তাহারা ঘুমাইয়া পড়িল।

ক্রমে জানালার রক্তপথে প্রভাতের আলোকরশ্মি প্রবেশ করিতে লাগিল। তখনও দুই জনে নিদ্রাভিভূত।

সহসা বাহির হইতে উমাপ্রসাদের পিতা ডাকিলেন—“উমা।”

প্রথমে ঘুম ভাঙ্গিল দয়ার। সে গা ঠেলিয়া স্বামীকে জাগাইয়া দিল।

কালীকঙ্কর আবার ডাকিলেন—“উমা!” স্বরটা কম্পিত, যেন অন্য রূপ, ইহা যে তাঁহারি কণ্ঠস্বর তাহা যেন কষ্টে বুঝা গেল।

এত ভোরে পিতা ত কখনও ডাকেন না। আর তাঁহার স্বরই বা এমন হইল কেন?—তবে সত্য সত্যই খোকার কিছু অসুখ বিসুখ করিয়াছে বুঝি! উমাপ্রসাদ তাড়াতাড়ি উঠিয়া দয়ার খুলিয়া দিল।

দেখিল, পিতার পরিধানে রক্তবর্ণ কৌষের বস্ত্র, স্কন্ধে নামাবলী উত্তরীয়, গলে রুদ্রাক্ষমালা লম্বমান। এ কি! এত ভোরে তাঁহার পূজার বেশ কেন? অন্য দিন গঙ্গাস্নান করিয়া আসিয়া তবে তিনি পূজার বেশ পরিধান করেন। মুহূর্তকালের মধ্যে এই চিন্তাপরস্পরা উমাপ্রসাদের মস্তকে উদিত হইল।

দ্বার খুলবামাত্র কালীকঙ্কর পুত্রকে জিজ্ঞাসা করিলেন—“বাবা, ছোটবউমা কোথায়?”

স্বর পূর্ববৎ কম্পিত। উমাপ্রসাদ কঙ্কর চারিদিকে চাহিল। দয়া শয্যাত্যাগ করিয়া উঠিয়া, কিন্তু, কিছু দূরে জড়সড় হইয়া দাঁড়াইয়া ছিল।

কালীকঙ্করও সেই দিকে নেত্রপাত করিলেন। বধুকে দেখিতে পাইবামাত্র নিকটবর্তী হইয়া তাহার পদতলে সাষ্টাঙ্গ প্রণিপাত করিলেন।

উমাপ্রসাদ বিস্ময়ে বাকহীন। দয়াময়ী শ্বশুরের এই অদ্ভুতচরণ দেখিয়া নিস্পন্দভাবে দাঁড়াইয়া রহিল।

প্রণামান্তে কালীকিঙ্কর বলিলেন,—“মা, আমার জন্ম সার্থক হল। কিন্তু এত দিন কেন বলিসনি মা?”

উমাপ্রসাদ বলিল—“বাবা—বাবা!”

কালীকিঙ্কর বলিলেন—“বাবা, ইহাকে প্রণাম কর।”

উমাপ্রসাদ বলিল, “বাবা—আপনি কি উন্মাদ হয়েছেন?”

উন্মাদ হইনি বাবা, এতদিন উন্মাদ ছিলাম বটে। আজ আরোগ্যলাভ করেছি, সেও মার কৃপায়।”

উমাপ্রসাদ পিতার কথার কিছুই অর্থগ্রহণ করিতে পারিল না। বলিল—“বাবা, আপনি কি বলছেন?”

কালীকিঙ্কর বলিলেন—“বাবা আমার বড় সৌভাগ্য। যে কুলে জন্মেছি তা পবিত্র হল। বাল্যকালে কালীমন্ত্রে দীক্ষিত হয়েছি, এত দিন যে সাধনা, যে আরাধনা করলাম তা নিষ্ফল হয় নি। মা জগন্ময়ী কৃপা করে ছোটবউমার মূর্তিতে আমার গৃহে স্বয়ং অবতীর্ণা হয়েছেন। গত রজনীতে স্বপ্নযোগে আমি এই প্রত্যাদেশ পেয়েছি। আমার জীবন ধন্য হল।”

দয়াময়ী ছিল মানবী—সহসা দেবীত্বে অভিষিক্ত হইল।

পূর্বোক্ত ঘটনার পর দিন দিন অতিবাহিত হইয়াছে। এই দিবসত্রয়ে এ সংবাদ বহুদূর ব্যাপ্ত হইয়া গিয়াছে। আশে-পাশের বহু গ্রাম হইতে বহু জন আসিয়া প্রসিদ্ধ শাক্ত-জমিদার কালীকিঙ্কর রায়ের বাটীতে দয়াময়ী-রূপিণী আদ্যাশক্তিকে দর্শন করিয়া গিয়াছে।

দয়াময়ীর রীতিমত পূজা আরম্ভ হইয়াছে। ধূপ-দীপ জ্বালিয়া, শঙ্খ-ঘণ্টা বাজাইয়া, ষোড়শোপচারে তাহার পূজা হয়। এ কয় দিন দয়াময়ীর সম্মুখে বহুসংখ্যক ছাগবলি হইয়া গিয়াছে।

কিন্তু এ তিন দিন দেবতার পূজা পাইয়াও দয়াময়ী কেবল কাঁদিতেছে। আহার নিদ্রা এক প্রকার ত্যাগ করিয়াছে বলিলেই হয়। এই আকস্মিক অদ্ভুত ঘটনায় তাহাকে এমন অভিভূত, বিপর্যস্ত করিয়া ফেলিয়াছে যে সে দুই দিন আগে এ বাটীর বধু ছিল, শ্বশুর ও ভাসুরের সাক্ষাতে বাহির হইত না, এ সমস্তই বিস্মৃত হইয়াছে। এখন আর তাহার মুখে অবগুষ্ঠন নাই—যাহার তাহার পানে শূন্য দৃষ্টিতে পাগলিনীর মত চাহিয়া থাকে। তাহার কণ্ঠস্বর অত্যন্ত মৃদুভাবাপন্ন হইয়াছে, রক্তবর্ণ চক্ষু দুইটি ফুলিয়াছে, বেশবাস সুসম্বৃত নহে।

রাত্রি দ্বিপ্রহর। পূজার ঘরে একটি কোণে ঘৃতদীপ মিটি মিটি করিয়া জ্বলিতেছে। পুরু কন্দলের বিছানার রেশমী বস্ত্রের আবরণ, তাহার উপর দয়াময়ী শয়ন করিয়া আছে। গায়ে একখানি মোটা শাল। দুয়ার বন্ধ ছিল মাত্র, অর্গলিত ছিল না। অত্যন্ত ধীরে ধীরে সে দুয়ার খুলিতে লাগিল। চোরের মত সত্তর্পণে উমাপ্রসাদ প্রবেশ করিল। দুয়ার বন্ধ করিয়া খিল দিল।

উমাপ্রসাদ দয়াময়ীর বিছানায় আসিয়া বসিল। সে দিন উষা কালের ঘটনার পর স্ত্রীর সহিত এই তাহার প্রথম নিভৃত সাক্ষাৎ।

দয়াময়ী জাগিয়া ছিল, স্বামীকে দেখিয়া উঠিয়া বসিল।

উমাপ্রসাদ বলিল—“দয়া, একি হল?”

আঃ—আজ তিন দিনের পর দয়া স্বামীর মুখে একটি স্নেহমাথা কথা শুনি। এ তিন দিন কাল ভক্তগণের মা মা শব্দে তাহার হৃদয়দেশ মরুভূমির মত শুষ্ক হইয়া পড়িয়াছিল। স্বামীর মুখনিঃসৃত এই আদরের বাণী তাহার প্রাণে যেন অকস্মাৎ সুধাবৃষ্টি করিয়া দিল। দয়া স্বামীর বুক মুখ লুকাইল।

উমাপ্রসাদ স্ত্রীর গায়ের শাল মোচন করিয়া তাহাকে বক্ষে চাপিয়া ধরিল। উচ্ছ্বসিত স্বরে বারংবার বলিতে লাগিল—“দয়া—দয়া একি হল—একি হল?”

দয়া নির্বাক।

উমাপ্রসাদও কিয়ৎক্ষণ নীরব রহিল। তার পরে বলিল—“দয়া, তোমার কি মনে হয় যে এ কথা সত্যি? তুমি আমার দয়া নও, তুমি দেবী?”

এইবার দয়া কথা কহিল—বলিল—“না, আমি তোমার স্ত্রী ছাড়া আর কিছু নই, আমি তোমার দয়া ছাড়া আর কিছু নই,—আমি দেবী নই—আমি কালী নই।”

এ কথা শুনিয়া উমাপ্রসাদ সাগ্রহে স্ত্রীর মুখচুম্বন করিল। বলিল—“দয়া, তবে বল, আমরা এখন থেকে পালিয়ে যাই। এমন কোনও দূরদেশে গিয়ে থাকব যেখানে কেউ আর আমাদের সন্ধান পাবে না।”

দয়া বলিল—“তাই চল। কিন্তু কি উপায়ে যাবে?”

উমাপ্রসাদ বলিল—“সে সমস্ত আমি ঠিক করব, কিছু সময় যাবে।”

দয়া বলিল—“কবে? শীগগির কর—নইলে বেশি দিন আমি বাঁচব না। আমার প্রাণ ওষ্ঠাগত হয়েছে। যদি মৃত্যুও না হয়, তবে আমি পাগল হয়ে যাব।”

উমাপ্রসাদ বলিল—“না দয়া—তুমি কিছু ভেবো না। দিন সাত তুমি ধৈর্য ধরে থাক। আজ শনিবার! আগামী শনিবার রাতে তোমার কাছে আসব আবার—তোমাকে নিয়ে গৃহত্যাগ করব। এই সাত দিন তুমি আশায় বুক বেঁধে কাটিয়ে দাও, লক্ষ্মী আমার, সোনা আমার।”

দয়া বলিল—“আচ্ছা।”

উমাপ্রসাদ বলিল—“এখন তবে যাই, কেউ আবার এসে টেসে না পড়ে।”—বলিয়া সে পত্নীকে গাঢ় আলিঙ্গন করিয়া বিদায় লইল।

পরদিন প্রভাতে, দয়াময়ীর পূজা যখন প্রায় শেষ হইয়া আসিয়াছে, তখন গ্রামের এক জন অশীতিবর্ষ-বয়স্ক বৃদ্ধ লাঠিতে ভর করিয়া আসিয়া উপস্থিত হইলেন। তাহার কোটরানতর্গত চক্ষু দিয়া দর দর ধারায় অশ্রু প্রবাহিত হইতেছে। আসিয়াই, দয়াময়ীকে দেখিয়া গলবস্ত্র হইয়া তাহার সম্মুখে জানু পাতিয়া বসিয়া যুক্ত করে বলিতে লাগিলেন—“মা, আমি চিরকাল তোমার পূজো করে এসেছি। আজ আমার বড় বিপদ মা, আজ ভক্তকে রক্ষা কর।”

দয়াময়ী বৃদ্ধের মুখের পানে ফ্যাল ফ্যাল করিয়া চাহিয়া রহিল। পুরোহিত বলিলেন—“কোন দাদা, তোমার কি বিপদ হয়েছে?”

বৃদ্ধ বলিলেন—“আমার নাতিটি কয় দিন জ্বর বিকারে ভুগছিল। আজ সকালে কবরেজ জবাব দিয়ে গেছে। সে না বাঁচলে আমার বংশলোপ হবে, আমার ভিটেয় সন্দেহে দেবার আর কেউ থাকবে না। তাই মার কাছে তার প্রাণ ভিক্ষা চাইতে এসেছি।”

কালীকিঙ্কর চণ্ডীপাঠ করিতেছিলেন। তিনি বৃদ্ধের দুঃখে নিরতিশয় দুঃখিত হইয়া দয়াময়ীর মুখের পানে চাহিয়া বলিলেন—“মা গো, বুড়োর নাতিটিকে বাঁচিয়ে দিতে হবে মা। বলিয়া তিনি বৃদ্ধকে বলিলেন—দাদা, তোমার নাতিকে এনে মার পায়ের কাছে ফেলে রাখ, যমের বাবার সাধ্য হবে না এখড় থেকে নিয়ে যেতে।”

এ কথা শুনিয়া বৃদ্ধ মহা আশ্বস্ত হইলেন। যষ্টিতে ভর দিয়া গৃহাভিমুখে ছুটিলেন।

এক দণ্ড কাল পরে বিধবা পুত্রবধূর কোলে নাতিটির সহিত বৃদ্ধ ফিরিয়া আসিলেন। দয়াময়ীর পদতলে বিছানা করিয়া মৃতকল্প শিশুটিকে রাখা হইল কেবল মাঝে মাঝে চরণামৃতের পাত্র হইতে কুষি করিয়া কেটু একটু চরণামৃত লইয়া পুরোহিত তাহার মুখে দিতে লাগিলেন।

শিশুর মাতা বিধবা যুবতী দয়াময়ীর সখী। তাহার ব্যথাকাতর মুখ দেখিয়া দয়াময়ীর হৃদয় ব্যথিত হইল। শিশুটির পানে চাহিয়া দয়াময়ীর চক্ষে অশ্রু ভরিল। একান্ত মনে দেবতাকে প্রার্থনা করিতে লাগিল, “হে ঠাকুর, আমি দেবতা হই, কালী হই, মানুষ হই, যেই হই— এই ছেলোটিকে বাঁচিয়ে দাও ঠাকুর।”

দয়াময়ীর চক্ষে অশ্রু দেখিয়া সকলে বলিয়া উঠিল—“জয় মা কালী, জয় মা দয়াময়ী, মায়ের দয়া হয়েছে—মায়ের চোখে জল।”

কালীকিঙ্কর দ্বিগুণ ভক্তির সহিত চণ্ডীপাঠ করিতে লাগিলেন।

বেলা যত বাড়িতে লাগিল, শিশুটির অবস্থা উত্তরোত্তর ততই ভাল হইতে লাগিল। সন্ধ্যার পূর্বে সকলে মত প্রকাশ করিলেন আর শিশুর জীবনের কোনও আশঙ্কা নাই, স্বচ্ছন্দে বাড়ি পাঠাইয়া দেওয়া যাইতে পারে।

দয়াময়ীর দেবীত্ব আবিষ্কারের সংবাদ যত না শীঘ্র চৌদিকে ব্যাপ্ত হইয়াছিল, তাহার মুমূর্ষু শিশুর প্রাণরক্ষার সংবাদ অধিক সত্বর প্রচারিত হইয়া পড়িল। পরদিন প্রাতেই অপর একজন আসিয়া দয়াময়ীর চরণে নিবেদন জানাইল যে, তাহার কন্যাটি আজ তিন দিন হইতে প্রসব যন্ত্রণায় অস্থির, মেয়ে বুঝি বাঁচে না। কালীকিঙ্কর বলিলেন—“তার জন্যে আর চিন্তা কি? মার চরণামৃত নিয়ে গিয়ে মেয়েকে পান করিয়া দাওগে। এখন আরাম হবে।”

সে ব্যক্তি গলদশ্রলোচনে দয়াময়ীর চরণামৃতের পাত্রটি মাথায় বহন করিয়া লইয়া গেল। বেলা এক প্রহর অতীত হইবার পূর্বেই সংবাদ আসিল মেয়েটি চরণামৃত পান করিবার অব্যবহিত পরেই নিরাপদে রাজপুত্রের মত সুন্দর সুলক্ষণ-সম্পন্ন পুত্রসন্তান প্রসব করিয়াছে।

আজ শনিবার। আজ উমাপ্রসাদ স্ত্রীকে লইয়া গোপনে পলায়ন করিবে। সে সমস্ত আয়োজন করিয়াছে। অর্থ সংগ্রহ করিয়াছে। মুর্শিদাবাদ কিম্বা রাজমহল কিম্বা বর্দ্ধমান এরূপ কোনও নিকটবর্তী প্রসিদ্ধ স্থানে সে যাইবে না, যাইলে ধরা পড়িবার সম্ভাবনা। নৌকাপথে পশ্চিম যাইবে। অনেক দূর যাইবে;—কোথায়, এখনও তাহার কিছু স্থিরতা নাই। হয় ভাগলপুর, নয় মুন্সের। সেখানে চাকরির চেষ্টা করিবে। পথ-খরচের মত অর্থ

তাহার নিকট আছে। তাহার স্ত্রীর গায়ে যে অলঙ্কার আছে, তাহা বিক্রয় করলে দুই বৎসর উভয়ের গ্রাসাচ্ছদন চলিতে পারিবে! দুই বৎসরেও কি তাহার একটা চাকরি জুটিবে না? নিশ্চয় জুটিবে। চেষ্টার অসাধ্য কিছু আছে না কি?

এইরূপ নানা চিন্তায় উমাপ্রসাদ দিবাভাগ অতিবাহিত করিল। ক্রমে সন্ধ্যা হইল। আজ সে দয়াময়ীর আরতি দেখিবে। এক দিনও ত দেখে নাই। যখন শঙ্খ ঘণ্টার ধ্বনিতে চণ্ডীমণ্ডপ ফাটিয়া যায়, পূজা আরম্ভ হয়, তখন উমাপ্রসাদ বাড়ি ছাড়িয়া গ্রামের বাহিরে পলায়ন করে। আজ দয়াময়ীর শেষ আরতি, আজ সে দেখিবে। দেখিবে আর মনে মনে হাসিবে। কল্যাণ প্রভাতে পুরোহিত ঠাকুর যখন সত্রাগ্রে আসিয়া দেখিবেন যে দেবী অন্তর্দ্বান করিয়াছেন, তখন তাঁহার কিরূপ অবস্থা হইবে, তাহাই উমাপ্রসাদ কল্পনা করিতে লাগিল।

রাত্রি দ্বিপ্রহর সমাগত। গৃহস্থ সকলে নিদ্রাগত। চোরের মত উমাপ্রসাদ শয্যাভ্যাগ করিল। অন্ধকারে ধীরপদে পূজার ঘরের দিকে অগ্রসর হইল। ধীরে ধীরে দ্বার মোচন করিয়া ভিতরে প্রবেশ করিল। কোণে সেইরূপ ঘটদীপ মিটি মিটি করিয়া জ্বলিতেছে। দয়াময়ীর শয্যায় উমাপ্রসাদ গিয়া বসিল। দয়াময়ী নিদ্রামগ্ন।

প্রথমে উমাপ্রসাদ সন্নেহে দয়াময়ীর মুখচুম্বন করিল। পরে গা ঠেলিয়া তাহাকে জাগাইল। নিদ্রাভঙ্গে দয়াময়ী ধড়মড় করিয়া বিছানায় উঠিয়া বসিল।

উমাপ্রসাদ বলিল—‘দয়া—এত ঘুম? ওঠে, চল।’

দয়া বিস্মিতের মত বলিল—‘কোথায়?’

‘কোথায়?—যাবার সময় তুমি জিজ্ঞাসা করছ, কোথায়—চল, আজ রাত্রে নৌকা করে আমরা পশ্চিমে চলে যাই।’

দয়া কিয়ৎক্ষণ নীরবে চিন্তা করিল।

উমাপ্রসাদ বলিল, ‘ওঠ ওঠ ; পথে গিয়ে ভেবো এখন। সব ঠিকঠাক করে রেখেছি। চল চল।’

এই কথা বলিয়া উমাপ্রসাদ স্ত্রীর হস্তধারণ করিল।

দয়া সহসা হাত ছাড়াইয়া লইয়া বলিল, ‘তুমি আর স্ত্রীভাবে আমাকে স্পর্শ কোরো না। আমি যে দেবী নই, আমি যে তোমার স্ত্রী, তা আর আমি নিশ্চয় করে বলতে পারি নে।’

কথাটা শুনিয়া উমাপ্রসাদ হাসিয়া উঠিল। স্ত্রীর গলা ধরিয়া তাহাকে চুম্বন করিতে যাইতেছিল। কিন্তু দয়াময়ী সহসা তাহার নিকট হইতে অপসৃত হইয়া দূরে বসিল। বলিল—‘না না, হয়ত তোমার অকল্যাণ হবে।’

এ কথায় উমাপ্রসাদ যেন বজ্রাহত হইল। বলিল—‘দয়া, তুমিও পাগল হলে?’

দয়া বলিল—‘তবে এত লোকের রোগ আরাম হল কেন? তা হলে কি দেশশুদ্ধ লোক পাগল?’

উমাপ্রসাদ অনেক করিয়া বুঝাইল। অনেক অনুনয় করিল। অনেক কাঁদিল।

দয়াময়ীর মুখে কেবল সেই কথা—‘না না, তোমার অকল্যাণ হবে। হয়ত আমি তোমার স্ত্রী নই, হয়ত আমি দেবী।’

শেষকালে উমাপ্রসাদ বলিল—“তুমি দেবী হলে এমন পাষণী হতে না। এততেও তোমার মন অচল অটল রইল?”

দয়াময়ী এবার কাঁদিতে কাঁদিতে বলিল—“ওগো, তুমি আমাকে বুঝতে পারলে না।”

উমাপ্রসাদ দয়াময়ীর শয্যা ত্যাগ করিয়া কিয়ৎক্ষণ ক্ষিপ্তের মত সেই কক্ষে অস্থিরভাবে পদচারণা করিয়া বেড়াইল। পরে হঠাৎ দয়াময়ীর কাছে আসিয়া বলিল—“দয়া, আমার সঙ্গে তোমার বিবাহ হয়েছিল?”

দয়া বলিল, “তা হয়েছিল বৈ কি!”

“তুমি যদি দেবী, তুমি যদি কালী, আমি ত তাহলে মহাদেব, নইলে তোমার সঙ্গে আমার বিবাহ হল কি করে?”

এ কথায় দয়া কি উত্তর দিবে? সে চুপ করিয়া রহিল।

উমাপ্রসাদ আবার আরম্ভ করিল—“তুমি যদি আদ্যাশক্তি ভগবতী হও—তবে নরলোকে কার সাধ্য যে তোমাকে বিবাহ করে? আমি যে তোমাকে বিবাহ করেছি, এত দিন যে আমি তোমার স্বামীর আসনে অধিষ্ঠিত রয়েছি, এতেই ত বোঝা যাচ্ছে যে আমিও মানুষ নই—অমিও দেবতা, আমিও স্বয়ং মহেশ্বর!”

দয়াময়ী বলিল—“যদি তাই হয়, তবে আমি তোমার স্ত্রী। দেবী হই, মানুষ হই, আমি তোমার স্ত্রী।”

এ কথা শুনিয়া উমাপ্রসাদ যেন হাতে স্বর্গ পাইল। স্ত্রীকে বক্ষে চাপিয়া ধরিল। বলিল—“চল, তবে আমরা যাই। এখানে যতদিন থাকব, তত দিন তোমার আমার বিচ্ছেদ থাকবে।”

দয়াময়ী বলিল—“তবে চল।”

খানিকটা হাঁটিয়া গঙ্গার ধারে পৌঁছিয়া নৌকা চড়িতে হইবে। কিন্তু কিছু দূর চলিয়া দয়া সহসা থামিয়া আবার বলিল, “আমি যাব না।” এবার স্বর অত্যন্ত দৃঢ়।

উমাপ্রসাদ আবার অনুনয়ের সাধ্যসাধনার পালা আরম্ভ করিল। কিছুতেই কিছু ফলোদয় হইল না।

দয়া বলিল—“আমি যদি দেবী, তুমি আমার স্বামী মহেশ্বর, তবে দুজনেই এখানে থাকি, দুজনেই পূজা গ্রহণ করি, পালাব কেন? এত জনের ভক্তিতে আঘাত দেব কেন? আমি পালাব না, চল ফিরে যাই।”

উমাপ্রসাদ মর্ম্মাহত হইয়া বলিল—“তুমি একা ফিরে যাও, আমি যাব না।”

তাহাই হইল। দয়া একা দেবীত্বে ফিরিয়া গেল। উমাপ্রসাদ সেই নিশীথ অন্ধকারে মিলাইয়া গেল। পরদিন তাহার আর কোন উদ্দেশ্য পাওয়া গেল না।

দয়াময়ীর দেবীত্বে সকলেই বিশ্বাসবান, কেবল বিশ্বাস কবে নাই তাহাদের বড়বধুর সুন্দরী—খোকার মা। প্রথম দুই চারি দিন তাই বড়বধূই দয়াময়ীর জুড়াবার ঠাই হইয়াছিলেন।

প্রথমে যখন স্বয়ং দয়াময়ীই বিশ্বাস করিতে চাহে নাই যে, সে দেবী, তখন সে একদিন বড়বধুর কাছে গিয়া কাঁদিয়া পড়িয়াছিল—“দিদি, আমার এ কি হল?” তিনি বলিয়াছিলেন—“কি করবো বোন, ঠাকুর পাগল হয়ে গিয়েছেন। বুড়ো বয়সে ওনার ভীমরতি ধরেছে।”

উমাপ্রসাদের নিরুদ্দেশের পর দুই সপ্তাহ গেল। তৃতীয় সপ্তাহে খোকার জ্বর হইল। দিন দিন ছেলে শুকাইয়া যাইতে লাগিল।

বৈদ্য আসিল, কিন্তু কালীকঙ্কর তাহাকে চিকিৎসা করিতে দিলেন না। বলিলেন—
“আমার বাড়িতে স্বয়ং মার অধিষ্ঠান, কত কত দুঃসাধ্য রোগ মা’র চরণামৃত পান করে ভাল হয়ে গেল, আর আমার বাড়িতে রোগ হলে বৈদ্য এসে চিকিৎসা করবে?”

বড়বধু নিজ স্বামী তারা প্রসাদের কাছে কাঁদিয়া পড়িলেন—“ওগো, ছেলেকে বন্ধি দেখাও গো, নইলে আমার ছেলে বাঁচবে না। ও রাঙ্কুসি ডাইনি আমার ছেলেকে বাঁচাতে পারবে না। ওর কি সাধ্য!”

তারাপ্রসাদ অত্যন্ত পিতৃভক্ত। পিতার বিশ্বাস, পিতার বিধান, এ সমস্ত তিনি বেদের মত মান্য করেন। তিনি স্ত্রীকে বলিলেন, ‘খবরদার ও কথা বোলা না, ছেলের অকল্যাণ হবে। মা যা করবেন তাই হবে।’

কিন্তু বড়বধুর প্রতিদিনকার কাকুতি মিনতি ও ক্রন্দনে কর্তা একদিন গলবস্ত্র হইয়া দায়াকে জিজ্ঞাসা করিলেন—“মা, খোকার যে ব্যারাম হয়েছে, তাতে বৈদ্য দেখাবার কোনও প্রয়োজন আছে কি?”

দয়াময়ী বলিল “না, আমিই ওকে ভাল করে দেব।”

কালীকঙ্কর নিশ্চিত হইলেন। তারাপ্রসাদও নিশ্চিত হইলেন।

খোকার মা একদিন একটি বিশ্বস্ত ঝিকে কবিরাজের কাছে পাঠাইয়া দিলেন—যাহা কিছু রোগের বিবরণ সব বলিয়া দিলেন। ঔষধ চাই।

কবিরাজ মহাশয় এ প্রস্তাব শুনিয়া দস্তে জিহ্বা দংশন করিয়া বলিলেন—“মাঠাকুরুণকে বলিস, যখন স্বয়ং শক্তি বলেছেন তিনিই খোকাকে আরোগ্য করে দেবেন, তখন আমি ওষুধের ব্যবস্থা করে অপরাধী হতে পারব না।”

যাহার সঙ্গে দেখা হয়, তাহাকেই খোকার মা কাঁদিয়া বলেন—“ওগো কিছু ওষুধ বলে দাও, আমার ছেলে বাঁচে না।”

সকলেই বলে—“ওমা, ও কথা বোলো না, তোমার ভাবনা কি? তোমার ঘরে স্বয়ং আদ্যাশক্তি বিরাজ করছেন।”

খোকার ব্যারাম ক্রমেই বাড়িয়া উঠিল। দয়া বলিল—“খোকাকে এনে আমার কোলে দাও।”

খোকাকে কোলে করিয়া দয়া সমস্ত দিন বসিয়া রহিল। খোকা অনেকটা ভাল রহিল। কিন্তু রাতে আবার খোকার ব্যারাম বৃদ্ধি হইল।

দয়াময়ী একান্ত মনে, একান্ত প্রাণে কত করিয়া খোকাকে আশীর্বাদ করিল, খোকার গায়ে হাত বুলাইল।

কিন্তু কিছুতেই খোকা বাঁচিল না।

যখন খোকার মৃত্যুসংবাদ বাড়িতে প্রচারিত হইল তখন তারাপ্রসাদ অধীর হইয়া ছুটিয়া আসিল—দয়াময়ীকে বলিল—“রাঙ্কুসি, খোকাকে নিলি? কিছুতেই মায়াত্যাগ করতে পারলিনে?”

খোকার মা প্রথমে শোকে অত্যন্ত বিহ্বল হইল। যখন কতকটা সুস্থ হইল তখন দয়াময়ীকে যা মুখে আসিল তাই বলিয়া গালি দিল। বলিল—“ও দেবী কোথায়? ও ডাইনি। দেবী কখনও ছেলে খায়?”

কালীকঙ্কর ছলছল নেত্রে দয়ার পানে চাহিয়া বলিলেন—“মা, খোকাকে ফিরিয়ে দে। এখনও দেহ নষ্ট হয় নি। ফিরিয়ে দে মা, ফিরিয়ে দে।”

দয়াময়ী ঝর ঝর করিয়া কাঁদিতে লাগিল। মনে মনে যমরাজকে উদ্দেশ করিয়া আঞ্জা করিল, “খেনি খোকার আত্মা খোকার শরীরে ফিরাইয়া দেওয়া হউক।”

তাহাতে যখন হইল না, তখন মিনতি করিল।

আদ্যাশক্তির মিনতিতেও যমরাজা খোকার প্রাণ ফিরাইয়া দিলেন না।

তখন নিজের দেবীত্বে দয়ার অবিশ্বাস জন্মিল।

আজ তাহার পূজা ইত্যাদি প্রায় বন্ধ বলিলেই হয়। সমস্ত দিন কেহ তাহার কাছে আসিল না। দয়া একাকিনী বলিয়া সারাদিন চিন্তা করিল।

সন্ধ্যা হইল। আরতির সময় উপস্থিত। যেমন তেমন করিয়া আরতি হইল।

পরদিন কালীকঙ্কর উঠিয়া পূজার ঘরে গিয়া দেখিলেন, সর্বনাশ! পরিধেয় বস্ত্র বজ্রধ্বংস মত করিয়া পাকাইয়া, কড়িকাঠে লাগাইয়া দেবী আত্মহত্যা করিয়াছে।